



Expediente IET: P-20-331
Proxecto: Parque eólico Maxal
Concellos: Rodeiro (Pontevedra); Antas de Ulla e Taboada
(Lugo)
Promotor: Galenergy, S.L.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 14/06/2021 a Dirección Xeral de Planificación Enerxética e Recursos Naturais da Vicepresidencia Segunda e Consellería de Economía, Empresa e Innovación, achega ao Instituto de Estudos do Territorio (IET) documentación relativa ao proxecto Parque eólico Maxal.

1. Antecedentes:

Con data do 17/07/2020 o Instituto de Estudos do Territorio emitiu un informe sobre este proxecto, no marco do procedemento de avaliación de impacto ambiental ordinaria. Nese informe indicábase que o estudo de impacto ambiental (EsiA), de acordo co artigo 11.1 da Lei 7/2008, do 7 de xullo, de protección da paisaxe de Galicia, tiña que incorporar un estudo de impacto e integración paisaxística (EIIP) como documento específico e cuxo contido tería que se axustar ao sinalado no artigo 11.2 da Lei 7/2008. Ademais, facíanse unha serie de consideracións sobre os posibles efectos do proxecto na paisaxe e se indicaban distintos criterios e recomendacións encamiñados a minimizar os impactos e acadar unha adecuada integración paisaxística do proxecto.

Con data do 19/04/2021 o IET emitiu un informe de impacto e integración paisaxística, de acordo co previsto no artigo 11.3 da Lei 7/2008. Nese informe indicábase que o EIIP debía completarse de acordo co disposto no artigo 11.2d da Lei 7/2008, do 7 de xullo, de protección da paisaxe de Galicia, e no artigo 27.d do Regulamento da Lei 7/2008, así como adaptarse ás determinacións das Directrices de paisaxe de Galicia. Respecto ás medidas preventivas e correctoras, se ben considerábanse en xeral adecuadas, facíanse unhas recomendacións para atenuar os impactos e acadar unha mellor integración paisaxística das infraestruturas do proxecto.

A documentación achegada pola Dirección Xeral de Planificación Enerxética e Recursos Naturais é a contestación da empresa promotora ao informe do IET do 19/04/2021.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia (Decreto 96/2020, do 29 de maio).



En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do Regulamento da Lei 7/2008.

3. Informe:

Como xa se tiña indicado nos anteriores informes, o proxecto provocará unha intrusión visual derivada da presenza das infraestruturas, principalmente os aeroxeradores e a torre meteorolóxica, nunha extensa área de topografía suave sen resaltes importantes no relevo, o que lle confire unha alta visibilidade nunha contorna de marcado carácter agrario. Se ben a presenza destas infraestruturas non constitúe un elemento alleo no lugar de implantación, a localización doutros parques nas proximidades, así como os que se están a tramitar, pode xerar unha visión monótona de aeroxeradores que reduce a calidade escénica da contorna. A este respecto cabe sinalar o impacto visual que pode producir o parque dada a dimensión dos aeroxeradores e a distancia á que se sitúan dos núcleos rurais, moitos deles a menos dun quilómetro.

Á vista do EIIP emendado do proxecto, que se achega na contestación recibida da empresa promotora, pode considerarse cumprimentado o disposto no artigo 11.2d da Lei 7/2008, de protección da paisaxe de Galicia, e no artigo 27.d do Regulamento da Lei 7/2008, dando resposta ademais ás consideracións efectuadas nos informes do IET con data do 17/07/2020 e 19/04/2021.

O xefe do Servizo de Planificación da Paisaxe
José Luís Álvarez Vicente

O director do Departamento Técnico de Estudos
José Antonio Serantes Barbeito

Visto e conforme, o director do Instituto de Estudos do Territorio
Francisco Barea Paz

(Documento asinado electronicamente)

